

太平寰宇記

第二十六册



太平寰宇記卷之一百

江南東道十二

福州

南劍州

福州

福州

長樂郡今理閩縣

古閩越之地亦揚州之域秦并天下

為閩中郡漢高帝立無諸為閩越王國都于此及

武帝時閩越反因滅之徙其人于江淮閒盡虛其

地後有遁逃山谷者頗出因立為冶縣以理之其

道蓋以越王冶鑄為名屬會稽郡尋為東冶縣後

漢改為侯官都尉屬不改後分冶地為會稽東南

二都尉此爲南部都尉東部今臨海是也吳于此
立西部都尉主謫徙之人作船于此晉置晉安郡
宋齊因之梁簡文帝封晉安王卽此地陳置閩州
後又改爲豐州隋平陳改爲泉州因泉山爲名煬
帝初改爲閩州又改爲建安郡唐武德八年又爲
豐州升置都督府貞觀初置泉州景雲二年改爲
閩州都督府督閩泉建漳湖五州開元十三年改
爲福州依舊都督府仍置經略使二十三年罷漳
湖二州督福建泉汀四州舊屬嶺南道天寶初屬
江南東道尋改爲長樂郡乾元元年復爲福州都

督府皇朝爲威武軍節度

元領縣十今十二

閩 侯官 福清 連江 古田 永泰 長溪

長樂 永貞 閩清 寧德 懷安自永貞以下新置

二縣割出

尤溪入南劍州 德化入泉州

州境

東西五百一十里 南北二百三十里

四至八到

西北至東京六千二百里

西北至西京六千六百五里

西北至長安七千二百九十五里

東至大山六十里山外至海貞元略云東至溫州
水路一千八百里

南至海二百里

南至泉州三百七十里

西至大山八十里外卽虔州雩都縣界

北至大山四十里山外至溫州界

東南至海一百六十四里

西南至泉州五百里

西北至汀州一千二百里

西北至建州七百二十里貞元略云六百里

東北至溫州水路一千四百七十八里

戶

唐開元戶三萬四千八十

皇朝戶主四萬八千八百客四萬五千六百七十

風俗

開元錄云閩縣越州地卽古東甌今建州亦其地
皆夷種有五姓謂林黃是其裔十道志云嗜慾衣
服別是一方

人物

自唐設舉場此州之才子登科者甚眾黃璞纂為

閩中名士錄

土產

美人蕉

其花四時皆開深紅照眼經月不謝

佛手柑

羊桃

龍

眼

一名荔奴

茉莉

蔗

榕

其大十圍凌冬不凋郡城中獨盛故號榕城

蕉葛

茶

白藤箱

簞

扇

輕絹

絲布

紵布

海蛤

麩金

乾薑

蚶蛇膽

荔枝

乾

貢今

橄欖

筍筍

乾白沙糖

貢今

閩縣

舊二十四鄉今十二鄉

漢縣以無諸所都故此立縣焉

南臺江在州南九里江闊九里源從建州建陽縣
來昔越王無諸于此臺釣得白龍因號釣龍臺

金鑠江在州西二十里閩中記云昔有漁父垂釣
得金鑠引鑠盡見金牛奔湧漁者急挽至岸牛斷
猶得鑠長二尺晉康帝詔于此立廟其神甚靈

九仙山在州東南二里越王九日燕于此山亦曰
九日山又俗傳昔有何氏兄弟九人于此學道上
昇故曰九仙山 越王山在州北二百五步卽越
王無諸舊城也其中有越王井井有金雞昔有人
見以石投之久而聞聲 昇山在州西北十四里

越王勾踐時一夜從會稽飛來西南地號道士洞
舊名飛山臨海人任敦于此昇仙其跡猶存天寶
六載勅改爲昇山 方山在州南七十里周迴一
百里山頂方平因號方山上有珍果惟就食則可
攜出卽迷天寶六載勅改爲甘果山 長樂山在
州東六里越時有神仙騎白馬來此因名白馬山
天寶六載勅改爲長樂山 鱔溪在州東二十里
源在鼓峯半其潭有鱔長三丈餘今有廟爲村人
祈求之所

侯官縣

南二百里
元十二鄉

漢縣屬閩越按郡國志云閩越之

地東閩在岐海中西越今建安郡是也東甌今永
寧郡是也漢武元鼎六年立都尉居侯官以禦兩
越所謂東北一侯也長安初置元和三年併侯官
縣入閩縣卽觀察使陸淮奏省之元和五年復立
爲縣 螺江在州西北二十五里搜神記云閩人
謝瑞少孤于此釣得一螺大如斗置之甕中每日
見盤饌甚豐後歸忽見一少女美麗燃竈之次女
曰我是白水素女天帝哀君少孤遣妾與君具膳
今旣已知妾當化去畱殼與君其米常滿瑞得其
米資及子孫因曰釣螺江 閩山去州一里二百

步周迴四里本名烏石山天寶六載勅名閩山

福山在州西水路十八里高二里神仙傳云董奉

侯官人也有宅在山下閩中記云山上有神人散

髮修真人見必獲福因以名之 營頭戍郡國志

云即越王無諸置 都圓浦郡國志云斯地多山

雞長栖止于杉樹 月嶼越王石輿地志侯官縣

南百餘里海邊有月嶼出海蛤海邊又有越王石

常隱雲霧相傳云唯清廉太守乃得見宋元徽中

太守盧愿觀見無隱

福清縣 東南一百一十里元十鄉 本閩縣之地唐聖曆二年析閩

縣東南之地置萬安縣天寶元年改爲福唐縣朱
梁改爲永昌縣後唐同光初復舊晉天福初改爲
南臺縣後復舊今爲福清縣

連江縣

東一百六十里元六鄉

唐武德六年分閩縣置連江縣

南海去縣五里

荻蘆山在縣東南三十里先

名九龍山山連石鼓山而來古老傳云秦始皇令

掘斷山脊乃見蘆根一莖長數丈斷之有血因名

荻蘆山

古田縣

西北七十里元四鄉

唐開元二十九年開山洞置

永泰縣

西南三百五十里元四鄉

圖經唐永泰二年置以年號爲

縣名按晉記東晉永嘉之亂渡江衣冠士族多依于此以求安堵當此之時必有縣後人或更改圖經未甚詳悉 大妃小妃山在縣東南五十里昔越王葬二妃于此山頭鑄鐵蓋以掩之 高蓋山在縣西七十里常有紫雲所蓋因曰高蓋山有水色如金亦曰金枝山太守陶夔記云山有石井深三丈石盆廣二丈清淨如鏡土人徐登在此得仙與東陽趙炳鬪仙術卽此處也

長溪縣

東北八百里舊十五鄉今三鄉

漢閩縣地唐武德六年置其

年併入連江縣長安二年又置溫麻縣以縣界有

溫麻溪爲名天寶元年改爲長溪縣 霍童山在
縣西二百五十里高七里岡甚遠山頂一峯如香
爐半山一峯名曰霍童上有壇壇上有石甕盛水
雨則不溢旱則不竭閩中記云鄧元伯王玄甫于
此山吞白霞丹得上昇之法內見五藏山下湧泉
味甘如蜜云是列仙霍童遊處天寶六年勅改爲
霍童山亦曰遊仙山

長樂縣

東南一百里舊八鄉今六鄉

本閩縣之地唐初立爲長樂

縣以長安樂爲名至元和三年省以地併入福唐
卽觀察使陸淮奏省之至五年復立縣

永貞縣 東北二百一十里三鄉 唐大中元年割連江縣一鄉置

羅源場至長興四年改爲永貞縣 洞宮山在縣

東北六里自武夷岩前連江接阜晉祚中興以旺

氣生于東南乃詔掘斷山脊皆有血流于羅浮移

老君聖像鎮于洞宮之下 四明山在縣西五里

其山屹然如削高列四峯中有古壇生葯絲竹交

蔭其上有石井泉甘如蜜撓之不渾雨之不溢蓋

靈異之所也

閩清縣 西北一百五十里今二鄉 唐貞觀元年割侯官一十里爲

梅溪場至梁乾化元年改爲縣

寧德縣東北三百里二鄉唐開成年中割長溪古田兩縣置

盛德場續改為縣

懷安縣西北四十里九鄉皇朝太平興國七年割閩縣敦業

等九鄉置懷安縣

南劍州

南劍州劍浦郡今理劍浦縣按晉書云延平津昔寶劍化龍之

地吳永安三年立為南平縣屬建安郡宋泰始四

年廢唐武德三年置延平為軍蓋以居咽喉總要

之地後為永平鎮偽唐保大四年立為延平軍因

析沙縣建安順昌等縣所管交溪上陽員當逐咨

大平寰宇記 卷之一
芹哨富沙等六里戶口共成九里爲軍額至保大
六年昇爲劍州仍割古田縣積善瀨溪二里其一
十一里爲劍浦縣又割沙縣順昌尤溪等縣來屬
皇朝太平興國四年割將樂縣以隸焉以西有劍
州此故名爲南劍州

領縣五

劍浦 順昌 沙縣 尤溪 將樂

州境

東西六百二十里 南北七百里

四至八到

北至東京三千五百六十五里

北至西京三千九百八十五里

東北至長安四千一百七十五里

東至福州古田縣界三百五十里

西至建州將樂縣界二百七十里

南至泉州德化縣六百九十里

北至寅仙山一十里其山自古已來北面險峻鳥

道不通人過

東北至建州一百五十里

西北小路至大山無路

東南至古田縣一百三十五里

西南至漳州龍巖縣五百里去州界七百三十里

戶

舊戶載建州籍

皇朝戶主三萬三千八百三十客二萬二千八百四十

風俗

同建州

人物

無

土產

花紋石

有山水禽魚狀可爲屏

白苧布

出將樂

紙

出將樂

金橘 茴香 稻有一十一種 金黍 赤鮮

白稔 先黃 金牛 青龍 虎皮 女兒 狹

糖 黑林 先白 茶有六般 白乳 金字

蠟面 骨子 山挺 銀字 麻竹可為筍筍

劍浦縣

十鄉 偽唐保大四年析沙縣建安順昌縣內

交溪上陽員當逐咨芹哨富沙等六里戶口其成

九里為延平軍至保大六年昇為劍州仍以古田

縣積善瀨溪兩里共一十一里仍為劍浦縣 三

溪在州前東溪西溪南溪合流南歸于海自古謂

之險灘 聞猿閣在州南常有二猿長啼于溪之

南嶺近有人誤殺其一後一猿不復啼 演仙山

在州西北十里古老傳云演氏煉丹于此丹竈餘

基猶存此山東面亦略通人跡山中出橘其味甘

美人有食者就之則可攜之出山即迷道又有演

仙水水出此山當郡城北為大河莫知深淺下有

暗竇入城流出劍潭居人資之或亢旱而常流不

絕

順昌縣

西二百三十里二鄉

本建安縣之校鄉地也吳永安三

年割建安之校鄉置將樂縣又移于將水口置屬

建安郡隋開皇九年與綏城縣同併入邵武之南

鄉屬撫州唐武德四年復立將樂綏城二縣至貞
觀三年又廢東南兩鄉屬建安縣置將水場西北
三鄉割屬邵武縣置金泉場元和五年依舊復將
樂縣額屬建州景福二年又置將水鎮尋改爲永
順場復立爲順昌縣焉 七臺山在縣西四十八
里其山磊落相連莫知其幾何有高峯峭壁動逾
千丈山有微雲當雨土人以爲候又有大溪在縣
南一里有徊村嶺高五十丈險峻鳥道至嶺頭坦
平路尋小溪而入其山徘徊掩映謂之徊村四面
皆絕道獨處一村其水自沙縣疵原分水爲界又

沿流此嶺頭頓落石崖兩處成瀑布各長十丈其
下成石井深不可測每天欲風雨其水作聲風雨
隨其聲大小也

沙縣

西南一百六十里三鄉

古之南平縣餘跡也自晉武帝時

為延平縣屬建州其地乃口南鄉邑地也至太元
四年廢縣額改為沙戍至唐武德四年立為沙縣
舊隸建州至大厯十二年隸汀州洎乾符後土寇
亂離漢路阻隔自興鄉寨本縣崇安鎮將鄧光布
移元口縣基于縣西北鄉外八里內楊箕析置即
今理也偽唐隸劍州 幼山在縣西北一百二十

里乃龍峽之地孤峯上聳三十餘里周迴二百里
山上有松檜竹柏其中有山魅其形似人生毛黑
色身長丈餘逢人而笑口上唇蓋眼下唇蓋胸人
見亦怪矣或時遺下藤製草鞋長二尺五寸鄉人
所謂山大人又云山魑或野人也爾雅云狒狒如
人被髮迅走食人卽此也 七朶山在縣前水南
山分七峯踊成石壁岩面生石椎青陽盧木等樹
春冬長青翠上有茜花每深秋競發馨香散漫市
郭人咸有美色 沙源經縣南二百步其水源出
汀州寧化縣黃土嶺至虔化縣界號曰沙源水水

勢懸峻聲殷如雷嶮巖如龍門過縣東一百二十里合邵武將樂溪水至建潭合建溪南下福州其水灘磧甚多內有九龍夢龍傷龍安龍三龍長龍馬龍三吾龍五日龍等灘言其險峻如龍也

尤溪縣 東南二百四十里四鄉 按縣理今當延平東南二百四

十里在福州城西北八百三十五里其地與漳州

龍巖縣汀州沙縣及福州侯官縣三處交界山洞

幽深溪灘嶮峻向有千里其諸境逃人多投此洞

開元二十八年經略使唐修忠使以書招諭其人

高伏等千餘戶請書版籍因為縣人皆胥悅此源

先號尤溪因爲縣名屬福州僞唐保大六年割屬
劍州 雙髻山在縣北與沙縣分界有水出此山
由建溪東流入古田縣九龍山下過合閩江向北
以此披分經二州之界 分枝嶺按縣圖云南至
泉州德化縣尤嶺爲界嶺上有分枝樹其樹一枝
向南一枝向北以樹枝分二州之界

將樂縣

三鄉

其地在越已有將樂之名按後漢書云永

安三年析建安之校鄉立將樂縣舊屬閩國晉屬
晉安齊兗州刺史桓崇祖受封于此歷代不改唐
元和三年併將樂縣以地入建安邵武二縣至五

年復立縣皇朝割隸劍州 金泉山在縣南二百

步蕭子開建安記云山南枕溪有細泉出沙彼人

以夏中水小披沙淘之得金山之西有金泉池焉

黎嶺在縣西北三十五里 石帆山在縣東北

三十里坤元錄云將樂石似張帆勢山畔有泉四

時皆澄清 天階山在縣南二十里建安記云山

下有寶華洞卽赤松子採藥之所洞中有泉有石

燕石蝙蝠石室石柱石臼石井俗云其井南通沙

縣溪復有乳泉自上而滴人取服之登嶺若昇碧

霄故有天階之號 三石山在縣西南一百八十

里建安記云山上有三石一高七百尺一高五百尺一高四百尺其石色紅白似人形其俗呼爲三郎石 百丈山在縣北一百八十里建安記云百丈山鳥道昔越王于上設置臺榭與撫州南豐縣分界上有古蘭若存 鳴鏡山在縣南一百九十里天欲雨其山有音樂聲 梅溪在縣西北八十里與邵武分界 將漢源從縣西南屈曲數百里合諸山水同溪入邑界 綏安故城建安記云晉隆安三年又改將樂西鄉置綏安縣隋開皇中併入邵武縣 高平苑蕭子開建安記云越王獵于

將樂野宮高平苑爲越王校獵之所大夫將軍校獵謂之大夫校兵士校獵謂之子校故將樂有大夫校子校二村後漢此邑爲建安縣之校鄉則其義也越王乘象輅曲蓋大夫將軍自執平蓋今有平蓋村載鳥其鳴鉦饒故今有鳴饒山也自樂野至于遊臺之上相去九十里故風俗至今好獵所尙由此來矣

校勘

南劍州

順昌縣

總序

唐武德四年復立將樂綏城二縣

按新唐書地理志武德四年析邵武置綏城隸建州五年析邵武置將樂隸撫州今皆云武德四年恐誤

至貞觀三年又廢

按新唐志武德七年省將樂貞觀三年省綏城今記皆云貞觀三年恐誤又新唐志將樂縣垂拱四年析邵武及故綏城縣地復置元和三年省五年復置今記爲略然諸書互見者蓋非一矣

太平寰宇記卷之一百終

太平寰宇記卷之一百一

江南東道十三

建州

邵武軍

龍焙監

建州

建州

建安郡今理建安縣

古閩越之地昔夏少康庶子無餘受

封于會稽世為越侯故有裔孫勾踐與吳爭王後

敗夫差遂併吳國按福州圖云勾踐六代孫為楚

所併其後有無諸以其境南泉山之地因而都之

稱閩越王其弟餘善至孫繇又以東海隅之地稱

閩越王俱是會稽之域遂有三越之稱秦併天下

屬閩中郡楚漢之際越王無諸帥越人佐漢滅楚
無諸自立號閩越王居其地餘善殺王郢又自立
漢因以繇爲王以奉祭祀尋爲漢兵所伐繇懼以
眾歸漢因分其地爲會稽郡治縣之北鄉後漢建
武中又爲東侯官縣建安初分東侯官之地爲建
安并南平漢興三縣吳永安三年割會稽南部以
建安將樂邵武建陽吳興延平東安侯官等九縣
爲建安郡晉廢郡以舊屬邑隸晉安郡今福州也
東晉郡又立之按郡國志云漢立郡于東溪南覆
船山下宋元嘉元年徙于溪北黃花山西梁承聖

三年封蕭基爲長樂侯于此梁末城池被盜陵夷
其後謝謁爲太守于西溪之右編木柵爲理所陳
太康四年郡守駱文廣復徙于覆船山下禎明元
年又移于今所隋開皇十年郡廢爲鎮唐武德四
年置建州領建安唐興建陽沙將樂邵武等縣天
寶元年改爲建安郡乾元元年復爲建州皇朝爲
建寧軍節度

元領縣八

今縣四場一

建安

浦城

建陽

松溪

新置

崇安場

新置

三縣割出

邵武

建軍

將樂入劍州

沙縣入劍州

州境

東西

缺

南北

缺

四至八到

西北至東京二千九百三十里

西北至西京三千八百三十五里

西北至長安四千六百九十五里

東至處州九百七十六里

貞元畧云九百里

南至福州七百二十里

貞元畧云六百里

西北至撫州八百三十里

西北至信州五百四十里

北至衢州一千一百里貞元畧云七百七十里

東南至福州七百二十里

西南至汀州二千四百里貞元畧云一千五百里

西北至饒州二千三百里

東北至衢州一千一百里

戶

唐開元戶二萬二千七百七十

皇朝戶主四萬六千六百三十七客四萬三千八

百五十五

風俗 同福州

人物

顧野王 仕陳為光祿卿

葉京 字垂孫建安人官太常博士州人登第自京始

江文蔚 字君章建陽人拜御史中丞

江為 文蔚族子遊廬山累辟不赴

土產

蕉花練茶 茶經云建州方山之芽及紫筍片大極硬須湯浸之方可碾極治頭痛江

東老人多味之

建安縣 十二鄉 地本孫策于建安初分東侯官之地立

此邑即以年號為名屬會稽南部都尉元是閩國

吳永安三年始立建安郡于此歷代如之唐武德

四年又置郡于此 黃花山郡圖云在郡東元嘉
元年徙郡于黃花山西是也 白鶴山在郡東郡

圖云晉以望氣者言此山有異氣命土工斷之乃
有二白鶴冲天而去因此爲名 冥聲廟與地志

云吳永安二年空裏聞人聲于此立廟令人平吉
五穀豐稔年常祈祠有福因爾立廟號冥聲廟出
建安郡記 登高山續齊諧記云費長房語桓景
曰君家當有厄可于九月九日舉家登山飲菊花
酒則免之景如其言九日登山暮歸見雞犬烏雀
皆頭斷而死 梨山在郡東南其山爲郡勝槩之

地 覆船山在郡南其山形如覆船昔太守駱文
廣移郡于此山之北 茶山在郡北民多植茶于
此山涉冬翠茂俯瞰城郭 梅君山在郡東南云
梅福煉藥于此山上昇因名之 夢水郡國志云
建州夢水有沙蝨又云短獨蟲一名蟻似龜射人
所中之處生瘡 仙人洲建安記云郡西南大溪
中昔梅真人上昇墜馬于此洲故後名墜馬洲
顧野王宅野王仕陳爲光祿卿此郡人其宅今爲
開元觀 古甌城郡圖云縣東有古甌城漢吳王
世子劉駒發兵圍東甌卽此也 故府城在縣東

南三百里卽漢時會稽南部都尉理此建安八年
置吳永安三年廢 水路柵在縣東二百里陳信
武將軍閩州刺史會稽太守侯官侯陳寶應置

浦城縣

西北三百六十
五里元十鄉

縣本後漢東侯官之北鄉也

獻帝末立漢興縣至吳永安三年改爲吳興縣歷
代不改按邑圖云晉尙書陸邁宋尙書郎江淹皆
爲吳興令按淹自序云吳興地東南嶠外閩越之
舊境是也唐武德四年改爲唐興縣天授二年改
爲武寧縣神龍初又爲唐興縣天寶元年八月改
爲浦城縣按謝靈運永嘉記云有二浦一曰浦城

柘水源出建安吳興縣此浦城俗爲越王城以城
臨浦故曰浦城 八面山在縣北四十里有八面
形極奇秀 孤山在縣西北五里蕭子開建安記
云孤山在環障之間其地坦平悉是溝塍阡陌以
此山挺然孤立因名焉梁江淹爲吳興令云此地
有碧水丹山珍木靈草爲邑之勝境 子期山在
縣西南二十五里建安記云子期山乃溪畔小石
峯也四面巖巒峭拔昔秦漢之間有仙人華子期
曾師商山四皓後居此山山因名之 泉山在縣
東北六十里記云山頂有泉分爲兩派一入處州

一入建溪卽漢書朱買臣言東越王保泉山一人
守險千人不得上卽此山 太湖山在縣西南一
百里記云太湖山一名聖湖山湖在山頂昔有採
藥者至此湖畔見滿湖芙蓉涉水采之乃石也亦
有禽鳥遠如飛翔近視則石 吳山在縣東五里
記云山四面秀異人居其側多吳姓漢興有吳氏
六千戶別屯大澤卽此之民也 大姥山在縣東
北七十里記云大姥卽魏夫人也老子玉貞經云
魏夫人以羅浮天臺大霍洞宮四處爲棲真之所
此山乃洞宮之隣也上有太母祠存焉 柘嶺在



縣東一百六十里東與處州麗水縣分界處 梨
巖在縣西北八十里因梨山以名之記云南嶺下
道東有鍾離古跡亭尙存今爲戍 上原嶺在縣
東北九十里道路不通牛馬與處州松陽縣分界
溫山在縣西北八十里建安記云此山有泉夏
寒冬煖 西巖嶺在縣東北二十九里晉陽敬儒
居此吳興陸邁常詣之開創居此上巖 建溪自
北東流入邑界 龍背潭在縣西南四十里潭東
有巨石數十丈狀如龍形昔有道士于潭中斬龍
今水微有血色 九石潭在縣西南四十里以潭

峯有九石相連因名之

建陽縣

西北一百六十里元七鄉

本後漢建安縣地又割建安地

爲桐鄉至十年平東校尉賀齊討上饒之城兼舊桐鄉置建平縣故吳志云建安十年權使賀齊討上饒建平縣是也晉太元四年改建平爲建陽因山之陽爲名隋開皇九年廢入建安縣唐武德四年復爲建陽八年又廢垂拱四年又置 武夷山在縣北一百二十八里蕭子開建安記云武夷山其高五百仞巖石悉紅紫二色望之若朝霞有石壁峭拔數百仞于烟嵐之中其間有木碓磨簸箕

籬箸什器等物靡不有之顧野王謂之地仙之宅
半巖有懸棺數千傳云昔有神人武夷君居此故
得名又坤元錄云建陽縣上百餘里有仙人葬山
亦神仙所居之地郡國志云漢武好祀天下嶽瀆
此山與祭故曰漢祀山陸鴻漸有記 欄杆山在
縣北二百九十里建安記云欄杆山南與武夷山
相對半巖有石室可容六十人巖口有木欄杆飛
閣棧道遠望石室中隱隱有床帳案几之屬巖石
間悉生石柏懸棺仙葬多類武夷云是仙人葬骨
建溪在縣東一百步源從武夷山下西北來縣

界也

松溪縣

西三百四十里元三鄉

本建安縣地舊為閩越之界成

兵所屯號松溪鎮焉偽唐保大中得閩地因為縣

取舊鎮為名其界松溪源自處州龍泉縣東北流

入自縣正西合于建安縣界 松溪在縣西三十

里即建安縣界

崇安場

二百四十里無鄉管三里

本建陽縣東北三里偽唐保大

九年割為場

邵武軍

邵武軍

理邵武縣

本建州邵武縣地皇朝太平興國五年

以戶口繁會路當要衝于縣置邵武軍從轉運司
之奏請也仍析邵武之二鄉爲光澤縣并割建州
之歸化建寧二縣來屬

領縣四

邵武 光澤 歸化 建寧

軍境

東西二百三十里 南北二百六十五里

四至八到

新置軍未有至二京里數

東至建州三百六十里

西至建昌軍水路六百九里

南至將樂縣一百三十五里至汀州六百四十里
北至信州五百六十里

東南至將樂縣三百七十五里

西南至將樂縣三百六十一里

西北至信州弋陽縣三百七十五里

東北至建陽縣水陸路七百二十四里

戶

舊戶載建州籍

皇朝戶主三萬四千三百九十一客一萬三千四

百九十

風俗 同建州

土產 同建州

邵武縣 舊六鄉今四鄉 本後漢東侯官縣之北鄉也建安元

年孫策稱會稽守置南平縣吳景帝三年改爲昭

武縣晉太康三年改爲邵武縣太寧元年又改爲

邵陽縣宋永初元年復爲邵武縣屬建州隋開皇

十八年廢郡縣隸撫州唐武德四年復立州又隸

建州晉天福初改爲昭武縣漢初復舊 唐溪蕭

子開建安記云邵武縣眾山西北來開溪源出縣

西烏嶺撫州南城界謂之應溪東流下與密溪烏
溪合東南入至萬福亭入縣界 烏君山在縣西
一百里高二千二百丈記云山頂有二石一高十
丈一高八丈形皆蒼黑間葉分枝狀如雙蔓謂之
雙石又秦漢之代有徐仲山者于此山遇神仙妃
耦多假烏皮爲羽飛走上下故山因名之今有烏
君石存焉 烏嶺山在縣西北三百里烏嶺峻極
不通牛馬以其與烏君山連接因此爲名魏王泰
坤元錄云邵武有庸嶺一名烏頭嶺北隰中有大
虵長七八丈爲患都尉長吏多致死者巫言啖童

女其都尉令長遂估賃人家婢子養之八月祭送
虵穴已九女矣將樂縣李誕有六女無男小女名
奇及受僱應之奇買好劍仍作數石米殮用蜜灌
之以置穴口虵夜出目如三尺鏡奇放犬咋蛇奇
從後以劍斫之虵踴出至庭而死 飛猿嶺在縣
西一百七十里高千二百丈建安記云飛猿嶺喬
木造天猿猱之所飛走故曰飛猿今爲鎮與撫州
南豐縣分界處 止馬亭在縣西百六十里洪氏
建安記云止馬亭當飛猿嶺口馬之登降于此止
息故名 長樂邨建安記云長樂邨後漢時此州

民居殷富地土廣闊孫策將欲檢其江左時鄰郡
亡逃或爲公私苛亂悉投于此因是有長樂將檢
二邨之名 廢烏阪城在縣東南三里建安記云
昔越王拒漢其城六此城一也

光澤縣

西八十里二鄉

本邵武縣地皇朝太平興國六年割

邵武之光澤金鳳二鄉于縣西八十里地名財演
鎮立光澤縣以鄉爲名

歸化縣

西一百一十里二鄉

本將樂縣地古之金銀場唐末于此

立歸化鎮後以去郡遙遠民難輸納戶口稍滋僞
唐保大三年立爲場周顯德五年改爲縣屬建州

其地去撫州南豐縣三百里去建州六百里皇朝
太平興國五年割屬軍

建寧縣

西三百四十里六鄉

本將樂縣地晉綏城縣莫徭之民

居焉唐武德中併入邵武垂拱年中割入將樂乾
元二年寧海軍使董玠奏置黃連鎮乾符五年爲
義寧軍復廢尋爲永寧鎮僞唐昇爲場至建隆二
年僞唐昇爲縣屬建州皇朝太平興國六年併永
安場入縣割隸本軍

龍焙監

龍焙監建州建安縣南鄉秦溪里地以本州地出銀

鑛皇朝開寶八年置場收銅銀至太平興國三年
昇爲龍焙監凡管七場

四至

東至福州古田縣八十里

一作四十

南至南劍州劍浦縣積善里界四十里

西至南劍州劍浦縣界杉口務三十里

北至建州一百五十里

所出礦石

白礦

黃礁礦

黑牙礦

松礦

水礮礦

黑

牙礁礦

光牙礦

土卯白礦

馬肝礁礦

桐

梅礁礦 赤生銅礦 紅礁夾生白礦

永興場 監西北三百里 在建安縣高陽里

永樂場 監北二百里 在建安縣安樂里

黃沙場 監西一十里 在建安縣南鄉秦溪里

褶紙場 監西北二十里 在建安縣秦溪里

大挺場 監北七十里 在建安縣秦溪里

東平場 監東北三百五十里 在建安縣東平里

杉溪場 監東北三百里 在建安縣杉溪里

太平寰宇記卷之一百一終

太平寰宇記卷之一百二

江南東道十四

泉州

漳州

汀州

興化軍

泉州

泉州

清源郡今理晉江縣

秦漢土地與長樂郡同東晉南渡衣

冠士族多萃其地以求安堵因立晉安郡宋齊以

後因之隋為泉州舊理閩縣後移於南安縣唐聖

厯二年始分泉州之莆田南安龍溪三縣置武榮

州三年州廢三縣還泉州久視元年又以三縣置

武榮州景雲二年改爲泉州開元二十九年割龍溪入漳州天寶元年改爲清源郡乾元元年復爲泉州皇朝爲平海軍節度

元領縣四

今七

晉江

南安

同安

自同安以下新置

永春

清溪

德化

惠安

三縣割出

莆田

仙遊

以上二縣入興化軍

長泰

新置入漳州

州境

東西三百四十七里

南北三百五十里

四至八到

西北至東京五千四百二十里

西北至西京五千八百三十五里

西北至長安六千六百九十五里

東至大海百二十里

貞元畧云一百里

南至大海一百八十里

西至錦田邨卽漳州龍巖縣界二百八十五里

北至仙遊縣一百五十里

東南至海四十里

西南至漳州六百里

貞元畧云三百五十里

西北至阜洋邨一百里

東北至福州五百里

戶

唐開元戶三萬一千六百

皇朝戶主五萬二千五十六客四萬四千五百二十五

風俗

泉郎卽此州之夷戶亦曰遊艇子卽盧循之餘晉末盧循寇暴爲劉裕所滅遺種逃叛散居山海至今種類尙繁唐武德八年都督王義童遣使招撫

得其首領周造麥細陵等竝受騎都尉令相統攝
不爲寇盜貞觀十年始輸半課其居止常在船上
兼結廬海畔隨時移徙不常厥所船頭尾尖高當
中平闊冲波逆浪都無畏懼名曰了烏船

姓氏

南安郡五姓 黃 林 單 威 仇

人物

自唐設舉場此州之才子間生登科者甚眾黃璞

纂爲名士錄

盛均

字之才永春人
官鄆州刺史

歐陽詹

字

周晉江人與韓愈等聯
第閩人舉進士自詹始

土產

蠲符紙貢 生蕉 白藤箱 蚌蛇膽 紅花

蕉 茜緋 葛 海舶 香藥 天門冬 鐵

鹽 枇杷 再熟稻春夏收訖其株又苗生至秋薄熟即吳都賦云再熟稻

橄欖 荔枝 龍眼 甘蔗 茉莉

晉江縣舊八鄉今五鄉地本長樂郡之屬邑晉立郡又為晉

安郡地焉隋廢郡為邑唐景雲二年分豐州之地

又于此立州 泉山在州北五里因此為名 晉

江在州南一里自南安縣來流五十里入海 尚

書塘唐貞元五年檢校戶部尚書趙昌為刺史置

塘以溉民田人蒙其利元和二年刺史馬聰美趙公之留惠名爲尙書塘 龍湖在縣南一百里有廟存焉

南安縣

舊十九鄉今九鄉

吳置東安縣晉置晉安郡於此陳

立南安縣唐武德五年置豐州貞觀初州廢來屬

桃林溪在縣西二十里自龍溪縣界來灌田三

百二十畝與綿田溪合入晉江縣界 九日山在

縣西一里山連晉江縣 金雞山在縣西南六里

同安縣

西南一百六十三里

唐貞元十九年析南安縣南界四

鄉置大同場福州僞命己亥歲升爲同安縣 煮

海里一邊在海中有島嶼四所計四百餘家居焉

無田疇人以釣魚拾螺為業

永春縣西一百五十里二鄉唐長慶二年析南安縣西界兩

鄉置桃林場福州偽命壬寅歲改為永春縣

清溪縣西一百五十里二鄉唐咸通五年析南安縣西界兩

鄉置桃林場江南偽命乙卯歲升為清溪縣

德化縣北二百一十里元二鄉元屬福州偽命日置庚戌年歸

屬當州

惠安縣去州四十里二鄉本晉江縣北鄉也皇朝太平興國

六年析置惠安縣

漳州

漳州漳浦郡今理漳浦縣歷代與長樂郡同按郡國志梁山有

漳浦水一云漳溪水唐垂拱二年析長樂郡西南

之地置漳州兼立漳浦縣以隸焉舊屬嶺南道天

寶中割屬江南東道仍為漳浦郡乾元元年復為

漳州

元領縣三 今四

龍溪 漳浦 龍巖 長泰泉州割至

州境

東西四百里 南北五百里

卷之二 一百一十一

四至八到

西北至東京六千五百七十里

西北至西京六千九百八十五里

西北至長安七千四十五里

東至大海一百五十里

南至大海一百六十二里

西至大海二百八十里

西至潮州五百六十里

西北至汀州九百里

北至建州二千四百里

東南至黃如江一百里

西南至廢懷恩縣界一百里

西南至潮州四百八十里

西北至石埭溪一百五十里

東北至泉州六百里

戶

唐開元戶一萬五千

皇朝戶主一萬九千七百三十客四千二百七十

七

風俗

同泉州

人物

唐周匡物

字幾本龍巖人初郡人未有業儒者自匡物以明經並舉進士郡人始知向學

土產

甲香

沙魚皮

鹽

蠟茶

銀魚

海舶

香

藥

長枝竹

龍溪縣

四鄉

舊屬泉州因龍溪為名唐開元二十九年

割屬漳州

九龍山山下有水名九龍水按郡國

志云一名鬼候山背有金溪水山中多山魃一名

羊花子

赤嶼有石朝色如丹晚色如霞因名亦

曰丹霞嶼

蜡湖郡國志云漳浦蜡隨潮之盈縮

梁嶼洲郡國志云在中洲有水豹水人 荆嶼

嶼上多荆草因名之

漳浦縣西南一百二十里三鄉按地本與龍溪地同垂拱二年

于龍溪立郡因而析置以隸焉

龍巖縣西北沂流五日約三百里三鄉唐武德以前為雜羅縣天寶

元年改為龍巖隸漳州

長泰縣西北五十里三鄉本屬泉州唐乾符三年析大同場

西界六里置武德場江南偽唐乙卯歲升為長泰

縣皇朝太平興國五年割屬漳州從轉運司之請

也

汀州

汀州臨汀郡今長汀縣按地理志歷代土地舊與長樂郡同

唐開元二十四年開福撫二州山洞置汀州天寶

元年改為臨汀郡乾元元年復為汀州牛肅紀聞云江東採

訪使奏於處州南山洞中置汀州州境五百里山

深林木秀茂以領長汀黃連雜羅三縣地多瘴癘

山都木客叢萃其中州初置在雜羅以其地瘴居民多死大

厯十四年移理長汀白石邨去舊州理三百里福

州觀察使承昭所奏移也按牛肅紀聞云州初移

皆豫章迫隘以新造州府故斬伐林木凡斬伐諸
樹其樹皆楓松大徑二三丈高者三百尺山都所
居其高者曰人都在其中者曰猪都處其下者曰
烏都人都即如人形而卑小男子婦人自為配耦

涪郡皆身如猪烏都皆人首盡能人言聞其聲而
不見其形亦鬼之流也三都皆在樹窟宅人都所
居最華人都或時見形當伐木時有術者周元太
能伏諸都禹步爲厲術則以左合赤索圍而伐之
樹既臥仆剖其中三都皆不
化則執而投之鑊中煮焉

元領縣三

今二

長汀 寧化

一縣割出

沙縣 入劍

州境

東西五百里

南北四百里

四至八到

東北至東京五千七百里

西北至西京五千三百里

西北至長安六千一百九十五里

東至龍溪縣二千四百五十里

南至潮州一千三百里若至潮州管下程鄉縣界

一千里

西至虔州雩都縣界九百里虔州一千二百里

北至撫州南豐縣界一千六百里

東南至漳州廢懷恩縣界一千五百里

西南至潮州程鄉縣界八百里

西北至撫州南豐縣一千六百里

東北至福州水陸相兼共一千三百六十里

東北至建州一千五百里

戶

唐開元戶四千六百八十

皇朝戶主一萬九千七百三十客四千二百七十

七

風俗

同福州

人物

無

土產

鼯鼠 鼯同

茶 龜甲 古圖經云進黃蠟蠟紙

出銀并銅 長汀縣有黃培場安豐場并
寧化縣有龍門場俱出銀銅 降真香

長汀縣 五地 即長樂郡屬邑唐開元中立郡舊治在

九龍水源長汀邨大厓中移在白石鄉地名金沙

水即今治也 雜羅故城牛肅記聞云開元末雜

羅縣令孫奉先晝日坐廳事有神見庭中披戈執

戈狀甚可畏奉先見之驚起神曰吾雜羅山神也

今從府主求一牛為食能見祭乎祭吾當佑爾奉

先對曰神既有請誠不敢違然格令有文殺牛事

大請以羊豕代牛可乎神怒曰惜一牛不以祭我

不佑爾其能宰乎因滅于是瘴癘大起月餘不息
奉先病死其家二十口亡盡 靈蛇山在州南三
百八十里 溪水在州東四十里地名石涵涵內
流出水從城過直至廣南通小船

靈化縣

東北六百
里二鄉

武德初爲黃連以地有黃連洞因
以爲名至天寶元年改爲靈化縣 鐵石山在縣

東一百五十里

上杭場州南去八日程接漳州界

武平場州西南去計五日程連循州界

興化軍

興化軍本泉州莆田縣地也皇朝太平興國四年于
泉州游洋鎮置興化軍以游洋百丈鎮共六里人
戶仍析莆田二里人戶置興化縣并割莆田仙遊
等縣以屬焉至八年以游洋鎮地不當要衝移于
莆田縣為軍理從轉運使楊克讓之所請也

領縣三

莆田 仙遊 興化

軍境

東西二百一十五里 南北一百四十五里

四至八到

新置軍未有至西京里數

西北至東京六千五百四十二里

東至海七十里

南至海四十里

東南至莆田縣奉國里大海一百里

北至福州福清縣一百五十里

西北至泉州一百八十里

東北至福州三百八十里

西北至福州永泰縣一百里

西南至泉州德化縣界一百四十五里

戶

舊戶載在泉州籍

皇朝戶主一萬三千一百七客二萬六百

風俗 同泉州

土產 同泉州

莆田縣 舊五鄉今六鄉 唐武德五年分安南縣置莆田縣屬

豐州州廢屬泉州今興化軍之理所 至孝闕唐

貞元十三年居人林攢廬于父墳至孝上感甘露

下降勅旌表門閭置闕在縣北三里

仙遊縣 西八十五里元四鄉 唐聖厯二年分莆田縣置清源縣

天寶元年八月改爲仙遊縣在大飛山前五里
九仙山在縣北四十五里 大飛山在縣北五里
瀑布山在縣東北五里其山峭峻懸崖有瀑泉
千尺而下者

興化縣

北八十里
今三鄉

隨軍所置解在軍敘中 百丈溪

東去縣七里有山巖百丈水流入福州福清縣
游洋溪從縣前流西入永泰縣舊鎮因此爲名

太平寰宇記卷之一百二終

太平寰宇記卷之一百三

江南西道一

宣州

廣德軍

宣州

宣州

宣城郡今宣城縣

禹貢揚州之域春秋時屬吳後吳為

越滅屬越又為楚所并戰國又屬于楚秦為鄣郡

之地今湖州長城縣西南八十里鄣郡故城是漢

為宛陵縣地理志云武帝元狩元年改鄣郡為丹

陽郡屬揚州地理宛城即今郡是也至順帝又改為

宣城郡據吳書云孫皓以何植為牛渚都督而禦

晉軍後晉平吳後武帝復移郡于此郡城卽晉桓
彝所築又桓玄傳云玄居南州大築齊地以郡在
國南故曰南州宋如之至齊改爲南豫州郡志云
梁承聖元年復江南南豫州郡不廢歷梁陳之代
亦爲重鎮隋平陳遂省宣城郡仍改南豫州爲宣
州蓋取郡號以爲州名煬帝初改州爲宣城縣唐
武德三年杜伏威歸順置宣州總管府分宣城置
懷安寧國二縣六年陷輔公祐七年賊平改置宣
州都督督宣潛猷池四州廢桃州以綏安來屬省
懷安寧國二縣宣州領宣城綏安二縣八年廢南

州以當塗來屬廢猷州以涇縣來屬九年移揚州
于江都以溧水丹陽來屬貞觀元年罷都督府廢
池州以秋浦南陵二縣來屬省丹陽入當塗縣開
元中析置青陽太平寧國三縣天寶元年改爲宣
城郡寶應二年又析太平縣置旌德乾元元年復
爲宣州永泰元年割秋浦青陽至德三縣置池州
宣州自後爲寧國軍節度皇朝因之

元領縣十

今六

宣城 涇縣 南陵 寧國 旌德 太平

四縣割出

大平寰宇記 卷之一百三
二
當塗

建太平州

廣德

置軍

溧水

入昇州

溧陽

入昇州

州境

東西四百六十二里

南北五百二十里

四至八到

西北至東京二千里

西北至西京二千三百五十里

西北至長安取滁州路三千一十里

東至湖州三百八十里

南至歙州三百八十三里

西隔江至廬州六百四十三里

北至潤州四百五十里

東南至杭州四百九十六里

西南至池州三百四十里

西北至和州二百五十六里

東北至常州五百里

戶

唐開元戶十萬九千七百九十

皇朝戶主三萬四千九百二十七客一萬二千二百二十五

風俗

漢書云丹陽郡本屬揚州吳地斗宿分野其人巧而少信多女而少男江南卑濕丈夫多天大抵人性風俗與兩浙相類

人物

紀隲字子上丹陽人父亮為尚書令隲為中書令每入朝以屏風隔座 甘卓字

思丹陽人卓外如柔弱 瞿劭先生隱文春山山中

內實堅正不附王敦 汪遵宣城人

土產

職方氏其利金錫竹箭畜宜鳥獸穀宜稻 南陵

利國山出銅 當塗縣界赤金山亦出好銅 紵

布 五色線毯 綺 綾 熟線綾 栗 紙

筆 綿 絹 黃連 雪梨 香狸

宣城縣

舊二十四鄉今一十五鄉

本漢舊縣也屬丹陽郡漢順帝

時立宣城郡于宣城縣按郡國志云故縣地名青

弋 敬亭山郡國志及宋永初山川記云宛陵北

有敬亭山山有神祠即謝朓賽神賦詩之所其神

云梓華府君頗有靈驗 三天洞東北去郡城五

十里 句溪一名東溪水源從寧國縣東鄉溪嶺

承天目山腳水源合流連接至此為句溪流向北

至郡門外過也 北浦里橋宣城記云元和中丹

陽太守馬稜坐事被徵句容人李南善風角賀稜
云明日日中有吉問明日稜延望景斜以爲無徵
至晡俄有使至原停稜事問何故遲留之狀使者
曰向渡宛陵浦里橋馬蹶足是以不得速 花姑
廟在郡北朝京門外東溪東岸去城一十里

涇縣

西南一百五
里元十七鄉

本漢舊縣地理志屬丹陽郡韋昭

注云涇水出蕪湖蓋因水立名唐武德二年置南
徐州于此其年又改爲猷州八年州廢縣仍隸宣
州焉 陵陽山在縣西南一百三十里列仙傳云
陵陽子明釣得白龍放之後五年龍來迎子明上

丹陽陵陽山一百餘年乃得仙去山高一千餘丈
又有子安者仙人也來就子明二十年一旦忽死
葬山下常有黃鶴棲其冢樹上鳴聲呼子安子安
蓋山在縣西南二百八十里紀義宣城記云蓋
山百許步有舒姑泉俗傳云昔有舒氏女未適人
其父析薪于此女忽坐泉處牽挽不動父遽歸告
家比來唯見清泉湛然其母曰女性好音樂乃作
絃歌卽泉湧浪迴復有赤鯉一雙躍出嬉戲至今
作樂泉水猶故沸涌

南陵縣

西一百里舊二
十三鄉今八鄉

本漢春谷

一作穀

縣屬丹陽郡

晉屬宣城郡後省併于湖縣尋又屬繁昌梁武帝
 置南陵縣屬南陵郡唐武德以來置縣在臨江有
 城基見存去今縣百三十里復于仁義鄉析置法
 門石錄一作兩場以別徵攝自後法門屬義安縣
 又廢義安入銅官冶為銅官場今銅官為銅陵縣
 石錄為繁昌縣皆此邑之地也 射的山據古老
 相傳上有玉在石壁內南面遙見有白處曾有人
 取上山後遇風雨不果今遠望頗似射侯故名射
 的山 戰鳥山在縣南十五里大江中輿地志云
 赭圻下流十許里有戰鳥圻孤在江中本名孤圻

山昔桓溫駐赭圻恒懼掩襲此圻宿鳥所棲中宵
鳴驚溫謂官軍至一時驚潰既定乃羣鳥驚噪故
相傳爲戰鳥山又按縣圖云孤圻山又曰蜃居山
在江心上有寺號靈山 赭圻屯在縣西北吳所
置赭圻屯處也晉哀帝以桓溫入參朝政自荊州
還至赭圻詔止之遂城赭圻鎮是也

寧國縣

東南一百二十里舊二十二鄉今十五鄉

本漢宛陵縣地志云漢

末分宛陵南鄉置焉初屬丹陽郡吳景帝時改屬
故鄣郡晉太康元年屬宣城郡按紀義宣城記云
周貢爲寧國長後遷丞相卽其地也逮隋廢入宣

城大業十四年復置唐武德六年復廢入宣城天
寶三年復置 文脊山一名曷山在縣西三十里
按何法盛晉中興書云有瞿矧先生不知姓名住
宣城文脊山卽其山也下有廟邑人祀之祈禱有
靈 鷓山出茶尤爲時貴茶經云味與蘄州同
擊鼓山在縣東南一百二十五里以其飛泉迅湍
聲如擊鼓 懷安故城在縣東南一百里地理志
云吳大帝分宛陵之地置屬丹陽郡至景帝時屬
故鄣郡晉太康二年屬宣城郡梁承聖年中屬丹
陽郡至陳天嘉五年廢入宣城縣今爲寧國界

孔子井在縣南一百一十里按吳地志云舊吳興郡安吉縣南界道旁有小井乃是孔夫子入吳時鑿此井今屬寧國縣

旌德縣

南二百三十里元九鄉

本漢涇縣地唐初爲太平縣地

永泰初以兵寇初平尙儲戎器此土征賦或有不供者因聚而爲盜以其山谷深邃舟車莫通不坐城邑無以鎮撫遂割太平縣九鄉以置焉冀其邑人從此被化故以旌德爲縣名又按續會要云旌德縣卽寶應二年析太平縣置 棲真山在縣西五里昔竇子明宰邑于池州石埭上昇曾居此山

其壇跡存焉

太平縣

西南二百八十五里元八鄉

本涇縣之地唐天寶十一載

以地居郡東南僻遠遊民多結聚爲盜邑人患之因安撫使奏非別立郡邑無以遏此澆競時以天下晏然立爲太平縣大厯中又廢至永泰中分涇縣龍門三鄉復置縣上涇下涇邑圖云產茶味與黃州同

廣德軍

廣德軍

今理廣德縣

本宣州廣德縣僞唐保大八年改爲

廣德制置皇朝太平興國四年建爲軍管廣德一

縣

軍境

東西一百五里

南北一百六十里

四至八到

新置軍未有至二京里數

東至湖州長興縣一百四十里

西至宣州宣城縣一百五十里

南至宣州寧國縣一百二十里

北至溧陽縣一百五十里

東南至湖州安吉縣一百三十里

卷之十一 百三

西南至寧國縣一百二十里

西北至溧陽縣二百三十里

東北至常州義興縣一百八十里

戶

皇朝戶主九千七百六客一千二百七

風俗同宣州

人物無

土產

茶 絲 紬 漆 絹 綿 布 桐油

廣德縣舊二十二鄉今十八鄉 本秦鄣郡之地漢以為故鄣縣

屬丹陽宋永初三年分宣城之廣德吳興之故鄣
長城義興之陽羨義鄉五縣立綏安縣梁末置大
梁郡尋又改爲陳留郡隋廢唐初復爲廣德縣屬
宣城郡皇朝建廣德軍此縣屬焉 丹井山在縣
南十里昔有徐真人于此燒丹有井存焉 荆山
洞在縣東北五十里 桐源山在縣南八十里按
左傳魯哀公十五年夏楚子西子期伐吳及桐汭
杜注云廣德縣西南有桐水出白石山西北入丹
陽湖也 祠山在縣西五里舊爲橫山有廣德王
張公祠天寶中封爲祠山 桐水在縣西北二十

五里源出白石山北流入宣城縣白沙川入丹陽湖廣德故城漢爲縣之所也

校勘

宣州

總序

永泰元年割秋浦青陽至德三縣置池州

按至德自饒州割隸池州今至德上脫饒州字蓋仍舊唐志之誤也

太平寰宇記卷之一百三終

太平寰宇記之一百四卷

江南西道二

歙州

歙州

新安郡今理歙縣

禹貢揚州之域春秋時其地屬吳後

屬越後越為楚滅即屬楚也秦并天下以此屬鄣

郡之地漢立丹陽郡後稍復封圻分王子弟成帝

封其孫雲容為廣德王與之黟音伊歙即此地漢獻

帝建安中歙率毛甘屯烏聊山黟率陳僕屯林歷

山孫權遣賀齊平之遂分歙置始新新定休陽黎

陽黟凡六縣立新都郡以領之理始新晉平吳改

新都郡爲新安郡歷宋齊梁陳竝因之隋平陳置
歙州以漢舊縣爲郡之名至煬帝州廢復爲新安
郡大業末土人汪華以天下擾攘遂據郡自保唐
武德四年討平汪華置歙州總管管歙睦衢三州
貞觀元年罷都督府天寶元年改爲新安郡乾元
元年復爲歙州

領縣六

歙 休寧 績溪 黟 祁門 婺源

州境

東西四百一十九里 南北二百八十二里

四至八到

西北至東京二千一百七十里

西北至西京二千二百二十五里取宣州路二千五百九十里

西北至長安睦州大路四千八百五里取潤州路三千四百五十里

東至杭州四百七十九里

南至睦州遂安縣二百四十六里

西至池州四百九十六里

北至宣州涇縣路二百九十三里

東南至睦州三百七十里

西南至饒州七百九十五里

西北至宣州涇縣二百八十五里

正北微東至宣州三百八十三里

戶

唐開元戶三萬八千三百二十

皇朝戶主四萬八千五百六十客三千二百三

風俗 同宣州

人物

程靈洗 字玄滌休寧人梁元帝授本郡太守卒諡忠壯

唐吳少微 歙人

汪華績溪人

汪臺符歙人

土產

硃紙 茶 硯 漆 墨 蜜 蠟 銀 鷓鴣

鷓鴣徒河切郡國志云翎下有青紅相映若垂綬狀如蜀雞背如朱

歙縣元十鄉本秦舊縣縣有水口名歙因浦以名漢屬

丹陽郡吳分立郡焉 靈山新安記云靈邨有山

生香草也名曰靈香又有黃精木上有靈壇道士

祈請不燒香自然芬馥邨人射獵經踐此土犯山

神終無所獲或失火燒岡其人必有疾病故曰靈

山又輿地志云靈山高峻有圓石高數丈上有石

蓋也 九頓山恆風樹木摧拔雖長成合抱而無
 大枝存則多于南面 北黟山在宣歙二州界縣
 西北一百六十里高一千一百七十丈南屬歙州
 豐樂水出焉舊名黃山天寶六年勅改為北黟山
 浙之東西歙池饒等山皆此山之支脈 烏聊山
 在縣東五步按吳記歙率毛甘領萬人屯烏聊孫
 權遣賀齊平之分黟歙為六縣蓋歙縣已在此其
 山為泉山所湊城西有四水合流山下有落星石
 深渡在縣東一百一十里與睦州分界從新安
 江上崇山峻流爽氣尤異欲到州界峯巒掩映狀

若雲屏實百城之襟帶 飛布山在縣北布射水
源出焉舊名主簿山天寶六年勅改飛布又按新
安記云昔因寇亂有歙縣主簿率百姓保據此山
因名主簿山 城陽山在縣南廻環孔高爲城郭
之襟帶居郡之南故號爲城陽焉卽許宣平得道
之所亦爲李白所尋不遇之處今山上有遺跡存
揚之水北從績溪縣東南流六十里至臨溪館
入歙縣界至郡城西與四水合流東南入新安江
卽今睦州界 吉陽水源從郡城西縣吉陽山下
出合大溪入新安江 苦溪在縣東南從揚之水

東南下抵深渡名曰八十里苦其中亂石磔磔洪
港斗折淙流騰激其急如箭雖三峽惡溪不方其
險也故名苦溪 釜底潭在縣南二里其面正圓
下則稍斂如釜底有斜穴潛與南京殷公井相通
湯泉在縣北北黟山東峯下香溪中泉口大于
碗出于石澗熱可燂雞 黃墩湖在縣西南四十
五里其湖有蜃常爲呂湖蜃所鬪程靈洗好勇而
善射夢蜃化爲道人告之曰吾爲呂湖蜃所厄明
日又來君能助吾必厚報束白練者吾也明日靈
洗彎弧助之中後蜃水變爲血不知所之其傷蜃

歸呂湖未到而斃後人名其死處爲蜃灘居歲餘
靈洗偶出有一道人詣靈洗母求食曰勞母設食
今當爲求善墓地使母隨行至山以白石識其地
曰葬此可以暴貴矣靈洗因移父葬其所侯景亂
靈洗率鄉人萬餘眾保新安因隨陳武帝有奇功
及陳武受梁禪靈洗以佐命功臣與周文育侯安
都爲三傑按靈洗宅在湖東二里 呂公灘在縣
東南舊名車輪灘以其亂石崇流中無港道行船
環曲有若車輪刺史呂季重募人鑿石爲港百姓
利之因謂之呂公灘 殷公井在縣南羅城內井

底有二斜穴一通縣北石壁潭一通縣南釜潭每
 石壁潭失物則于此并得之不以淘淬水常清潔
 初為殷氏鑿焉因此為名 石門是黃山之一峯
 兩山勢相逼山之半壁有大石橫架其上通兩山
 焉俗謂之石門 桃花米梁初任昉為新安守甚
 清廉後卒歸鄉船中惟有桃花米二十石今休寧
 縣猶為飯香軟 孔靈邨在縣南二十五里按晉
 書云孔愉字敬康會稽人永嘉之亂避地入新安
 山谷中以稼穡讀書為業信著隣里後忽捨去皆
 以為神人為之立廟愉官至尚書左僕射封餘不

亭侯按所居止在此故謂之孔靈山祀其上 昉
邨在縣北四十里俗說任昉爲新安太守因行春
至此愛其雲溪緣源尋幽累日不返百姓因名其
溪爲昉溪溪旁邨爲昉邨邨旁有山近故北野縣
每山上石墜則不利縣官縣廢後其事亦止大中
十年刺史盧潘改曰任公邨任公溪 廢北野城
在縣北二十五里永徽五年睦州清溪縣女子陳
碩貞作亂而縣人蔣寶舉兵應之事平遂置縣于
合五山上以鎮之至大厯五年廢 廢歸德縣在
郡西南五十里永泰元年草賊方清陷郡城而縣

人自割據八鄉之地保于此山不屬賊賊平因請置縣大厯五年廢

休寧縣

西六十六里元十一鄉

本吳孫權之所置也按吳圖云

吳割歙縣西川分置休陽縣在此縣之西二里楊邨東三里靈烏山上吳避孫休之名改為海陽縣仍移于萬歲山上晉平吳之後改為海寧縣隸新安郡歷晉宋齊梁陳不改隋平陳并省黟歙二縣百姓改屬海陽并隸東陽郡開皇十年東陽郡去邑遙遠即于黟縣割置新安郡以黟歙海寧三縣屬焉仍復改海寧為休寧縣以邑城因立郡仍隸

焉唐武德初復移于萬歲山舊城理天寶九載移
于舊邑西十三里卽今理也 鹿脾山在縣城西
北一百五十里昔有采藥人入山遇一老父鬚眉
皓然指藥而示之仍遺以鹿脾旣辭去回顧遂失
老父所在因名之 白岳山在縣西四十里山峯
獨聳有峻崖小道憑梯而上其三面竝絕壁二百
餘丈不通攀援峯頂闊四十畝有古堦跡瓦器池
水石室亦嘗有道者居之其東石壁五綵狀若樓
臺在雲中勢欲飛動又如神仙五六人憑欄觀望
久視之乃知非耳 五城水源從縣城南北流水

旁有五城邨古之大鎮有五城斜隅相對城旁有大墳有人發之其墳上鐵厚二尺鐵纜破即雷雨晦冥大懼而止容嶺在縣東有木石糖出空樹石罇中百姓每探得梁書曰任昉為新安守郡界密容嶺出糖昉以所處險遠長吏每遣百姓就採之昉至罷焉率山在縣東南四十里率水出焉山海經三天子都在率東蓋此山也浙溪水出浙嶺下至縣西一百一十里漢書地理志云浙江北經黟縣下東入海即此溪也廢北野縣周禮郊外曰野其地處州北故曰北野縣唐高祖七年

置大厯四年與隋置歸德縣地同廢入休寧縣

隋廢休寧縣在縣東南三十五里南當水口山上

廢吳休陽縣在今縣二里故城基尙在 廢海

陽縣在今縣東十三里舊名休陽在靈烏山上避

孫休之名改爲海陽縣仍移于萬歲山上至晉武

平吳又改爲海寧也

績溪縣

東北六十六里
舊七鄉今九鄉

縣則歛之華陽古鎮梁大同

元年置爲梁安縣唐武德年中廢至永泰二年宣

州旌德縣賊王萬敵入寇其地賊平置縣以界內

乳溪與徽溪相去一里迴轉屈曲竝流離而復合

謂之績溪縣因名焉 臨溪石在縣北三里臨溪

岸方圓二丈其平如砥溪水甚宜浣紗數里內婦

女悉來浣紗去家既遠遂于石上績而守之每春

花始布花柳交映多豔妝麗服羣績于此雖不浣

紗者亦有從而會績焉又曰其縣名績溪亦兼取

績之義也 三天子都山一名玉山在縣東南八

十里山海經云三天子都山在閩西海北郭璞注

云在新安歙縣東今謂之玉山浙江出其邊也顧

野王曰今永康縉雲山是三天子之都今在績溪

縣東九十里吳于此山分界焉 礬叢山在縣北

二十九里其山四合交湊中有大路向宣州寧國

縣路又二郡分界焉

新嶼山

一作郭鵝

在縣北二十

五里下有朗溪而駟路在焉兩邊有石壁長數百

步直下數百尺不生草木有類石洞焉 梓山廟

在縣南一里俗說初于山下置良安鄉地趾將創

舊有雙白石忽為雙白鳥飛向山遂于山上鳥棲

處立廟邑人敬之行立種植皆不敢背

黟縣

西一百五十二里元領四鄉

本秦舊縣置在黟川因名之漢

地理志云黟屬丹陽郡今縣南十八里有墨嶺山

嶺上有石特起十餘丈峯若劍峙時有靈鼓潛發

令長每以上鼓爲候鳴則不利于縣長又嶺旁竇
山墨石可書又新安圖經云歲貢柿心墨水黠之
名縣職此之由漢書韋昭音義黠音伊或從黝二
字相似蓋寫有誤焉隋廢爲海寧縣屬東陽郡其
舊城今在縣東五里武德三年復爲黠縣薛稷曾
爲此邑尉善畫鶴今邑人時有畫者蓋薛公之餘
風耳 牛泉山在縣北五十七里顧野王輿地志
云牛泉嶠通故廣陽縣自下上至山頂九里一頓
凡九頓山常風樹至合抱而高不至丈當頂有泉
方丈餘俗云牛跑所致亦猶虎跑泉也 魚亭山

在縣南二十五里每歲西江魚船至邗門縣捨舟
登陸止此東水次淹留待船故云魚亭焉 嶺山
在縣南一十八里嶺上有石如墨色嶺有穴中有
墨石軟膩土人取爲墨色碧甚鮮明可以記文字

復山

扶又反

在縣城南三十六里山甚孤峻石壁

四絕亦謂之五礫礫兩邊皆石壇中央有溝纔五
六尺許水甚懸峻捫蘿挽葛時有至者山翠激流
爲羣峯之秀其水東南流入休寧縣界 林歷山
在縣南十里吳大帝遣賀齊討黠山賊賊屯林歷
山四面壁立高數十丈徑路危狹不容刀盾賊臨

高下石不可得攻抱朴子云昔吳遣賀齊討山賊
賊中有善禁者官軍刀劍不得拔弓弩射矢皆還
自向賀曰吾聞金有刃者可禁蟲有毒者可禁其
無刃之物無毒之蟲則不可禁乃作勁木白楛選
有力軍卒爲先登盡提楛彼山賊禁者果不復行
戢兵山舊名石鼓山唐天寶中改爲戢兵在縣
城北邑圖云有石如鼓有石人石驢俗傳石鼓鳴
則驢鳴人哭而縣官不利後鑿破遂不復鳴 三
姑山一名吉陽山在縣東一十五里山有三峯故
名三姑山三年一遇野火所燒百姓燒之卽雨降

有吉陽水出焉又新安記云天將雨此山先有鼓角之音人以爲準 石墨井在縣南一十六里其

嶺上出石墨土人采之以書又有石墨井云是昔人采墨之所今爲懸水所漂其井轉深 僕城里

在縣西一十八里按顧野王輿地志黟帥陳僕屯

歷山今山下有僕城里俗說每社日僕則遣人掠邨社酒肉人苦之遂於社之明日爲社至今以爲

常式 獨母柴在縣南一十五里俗傳云昔有寡

婦死于山野無人葬埋邨人以薪覆之後人行經

其處者皆以一枝草投之至今不絕 譙貴谷輿

地志云黟縣北緣嶺行得譙貴谷昔土入入山行之七日至一斜穴廓然周三十里地甚平沃中有十餘家云是秦時離亂人入此避地又按邑圖有潛邨昔有十餘家不知何許人避難至此入石洞口悉為松蘿所翳每求鹽米農出潛處今見數十家同為一邨

祁門縣 西一百七十九里元七鄉 本名閭門著于秦漢之代縣有

巨石夾流水兩相對其狀如門故號閭門焉東北又有湧流其山左右雲峯削成其中坦陸周迴數頃唐永泰元年土人方清作亂屯石埭城故取其

城置邑因權立閭門縣其城拒險作固以爲守備
至二年平方清因其城邑定爲縣分饒州浮梁縣
及歙縣黟縣六鄉廣焉遂以所近祁山爲名因曰
祁門縣 祁山在縣東北一里三面石壁有石室
高五丈闊二十丈號青蘿巖旁有湧泉號乳泉味
甘山西半壁有大石方圓丈餘墜于溪中落處有
龍骨存焉 主簿山在縣西北昔有黟縣主簿巡
鄉到此愛其幽奇遂解印隱居其中終身不返
三新婦山在縣城東北上有三石峯狀如人形春
雨初晴朝陽暉映霞翠媛媚其狀若彩服靚妝之

飾因名爲三新婦山 閭門灘在縣西南一十里
夾灘兩岸有大壇石連至中流對涌相向號爲閭
門其間門怪石叢峙迅川奔注溪險石蹙跳波激
射摧艦碎舳商旅經此十敗七八 范不婁廟在
縣西八十里兩朝鄱陽縣尉范不婁領百人斫明
堂木于吳山中長數百尺川谷阻深無計能出懼
而據山作亂竟死于此

婺源縣

西南二百九里元六鄉

本晉休寧縣西南之廻王鄉唐

開元二十四年鄉人洪貞叛聚徒于此至二十八
年置縣以鎮之有婺水繞縣城三面故以爲名又

按東陽記云上應婺女舊與黟接境隋文帝廢黟
歙併入海寧而屬婺州縣又爲婺女之津蓋與今
婺州同義 婺水源從縣西北大廉山下出南流
九十里至縣繞城過與斜水合南流入樂平鄉界
石龍洞在縣西北十七里有石龍山山東北面
有石洞洞兩畔有石對聳爲門有如鐫鑿所成

吳邨在縣西七十五里昔吳王爲越所滅勾踐流
其三子而長子鴻處此死因葬焉遂名葬處爲吳
山里尋改爲婺女里 善山在縣南五十里又有
惡山隔溪對聳高下廻環一里風俗好善山爲善

太平寰宇記 卷之一百四
三
主惡山爲惡婦人因謂之妻婿山也石門灘在
縣西當溪兩岸有石並入溪中各踴起如雙闕中
間通流險阻如瞿塘濫瀕焉

太平寰宇記卷之一百四終